

ISICHASISO:

Abahlali bendlela

Ingxenye yesibili yencwadi uGenesisi iqukethe izingxoxo eziphathelene nabahlali bendlela ngokwenkolo yamaJuda.

Njengoba esahlukweni seshumi (10) neseshumi nanye (11) kuxoxwa ngesintu jikelele, sekuqhutshekwa-ke kuxoxwa ngoAbraham noSara, kuqhutshekwa emlandweni wesizwe sakwalzrayeli: Kuthiwa-ke uMvelingqangi wayefuna ukuziphembela isizwe esesiyoba nokuthintana okunzulu naye, okuyobona nezinye izizwe ngaso ukuthi ukwethembela koPhezukonke kuletha izinhlahla namathamsanqa. Uziqokela uAbraham umethembisa inzalo eyoba yisizwe esikhulukazi, umethembisa nomhlaba oyoba ngowakhe nezizukulwane zenzalo yakhe. UAbraham kwanamuhla lokhu waziselwa ukholo lwakhe: Ulandela ubizo, uphuma uyaphela kwelakubo eUr kwelaseKhaldeya, uphikelela kwelezizwe uSmakade ayethé uyomkhombisa Iona (esahlukweni se-12 kuGenesisi). Noma le nzalo ethenjisiwé yona ithatha kude ize ifike, ubambebele yena ezwini anikwa Iona.

Base bekhulile-nje impela oAbraham noSara ekutholeni kwabo uYisaka, indodana leyo ababekade beyilindele. Ngokuzalwa kwale ndodana sebezé baxishe balahla ithemba oSara noAbraham, uSomandla uziveza ngentshisekelo nangokwethembeka kwakhe njengoMdali walifeza izwi ayeliniké uAbraham. UYisaka waganwa nguRibheka, bathola amawele, oEsawu noJakobe.

UJakobe ungomncane njengoba bengamawele-nje; ngobuqili wamyenga wayengeka umnewabo, walintshontsha ilungelo lakhe lobuzibulo, yena belu ayengaligqizelé qakala nje-ke. Weqa enqené ulaka lwesibhongo, waye wayokhosela ekhaya konina eHaran, lapho agcina eganiselwé khona uLeya noRaheli, bathola ishumi nambili (12) lamadodana. Njengesiqiniseko sesibusiso uJakobe wethiwa igama elisha nguSmakade: ulzrayeli (isahluko sama-32 kuGenesisi).

Ngokuqhubeka kwengxoxo sizwa ngokuthengiswa kwendodana azithandela yona kakhulu uJakobe, uJosefa, ithengiswa ngabanewabo ngomona, beyithengisela abaseGibhithe. Ngeshwa uJosefa wangena ejele, wagcina ebe nenhlanhla yokuphuma ngenxa yesipho ayenaso sokuchaza amaphupho, wathola isikhundla esiphakeme embusweni kaFaro. Kwathi sekuhlaselé isomiso nendlala, abanewabo bakaJosefa bathunywa, bahamba baze bafika eGibhithe, bentula okudliwayo. Wagcina ebaxolele uJosefa, wabamema wabalungiselela ukuthi bathuthe, bazokwakha eGibhithe nabo (izahluko zama-37 kuya kwesama-50 kuGenesisi). Omunye wemiliba yesizwe sakwalzrayeli wavela enzalweni yabo. Izizwe eziyishumi nambili (12) zakwalzrayeli zizibiza ngamagama alezi zelamani ezingamadodana kaJakobe.

biblia zuluensis - ibhaybheli ngesiZulu
Convenor: Rev Dr Ben Khumalo-Seegelken
Alte Ziegelei 4 . D-26197 Huntlosen
eJalimane/Deutschland
www.benkhumalo-seegelken.de
Tel/Fax 0(0 49)44 87 - 75 02 85
biblia.zuluensis@t-online.de

29.12.2007